

# Nunatta Qitornai

## Inatsisartuni



01.oktober 2020

UKA2020/187

**Uunga siunnersuut: Siusinaartumik pensionisiat pillugit Inatsisartut inatsisaataallanngortinneqarnera pillugu Inatsisartut inatsisaat nr. xx, xx. xxx 2020-imeersoq. (Qulaajaanerit, piginnaangorsaqqiinerit, najukkani pissutsipissutigalugit tapiissuteqartitsigallarnerit aamma Siusinaartumikpensionisiaqarnermut maalaaruteqartarfimmut maalaaruteqarsinnaaneqpillugu erseqqissaaneq).**

(Isumaginninnermut, Ilaqutariinnut Inatsisinillu Atuutsitsinnermut Naalakkersuisoq)

Nunatsinni sulisinnaasut tamarmik pisariaqartippavut. Nunatsinni kinannguaq kinarsuarluunniit suliumasoq aqutissiuunneqassaaq suliffeqarnissaanut aammalu innutaasuni inuiaqatigiinni kivitseqataasinnaanngoqqullugu inatsisitigut illersugaassaaq.

Aamma suli pingaaruteqartigaaq sulisinnaanngitsortavut aamma inatsisitigut illersugaanissaat. Inatsisitigut pisinnaatitaaffiit tassaapput inuiaqatigiinni inissisimanermikkut qanoq atugaqarnissaannik tunaartaqartitsineq, tamannalu pisariaqartorujussuuvoq erseqqissuunissaa aammalu peqataaffigiuminartuunissaa inunnit pineqartunit.

Inuiaqatigiinni assigiinngitsunik peqquteqartumik sulisinnaajunnaarnersiuteqalersimasut nunaqqatigaavut aammalu suli sulisinnaajunnaarnersiuteqalernissamik qinnuteqartut piullutik. Inuiaqatigiinni 56.000 sinneqalaaginnartumi nunaqartuulluta tupinnaannartumik sulisinnaajunnaarnersiuteqartut nunanut allanut sanilliullugu amerlalluinnarput. Amerlalluinnarneri soorunami peqquteqarput, tamannalu soorlu ippassaq aningaasanut inatsisissaq oqaluuserigatsigu uagut Nunatta Qitornaaniit oqariartuutigaarput inuiaqatigiinni sumiginnaaneq aammalu kinguaassiuutitigut atornerluinerup nivarsiaqqat pingasuungaangata ataaseq aammalu nukappiaqqani kisitsit appasinerulaartoq atuutsillugit inuiaqatigiinnut tunniussassaqaqarniarneq aalajaanniarnertu inornartutut isigineqartarnera tassunga ataqatigiinnera oqaatigaarput, ulloq manna tikillugu suli taassuma ataqatigiinneranit suliniarneq takunatigu. Politikkikkut inuit sulisinnaanngissusaat pillugu itinerusumik inuttut atukkat pillugit misissuiffigineqartariaqarnerat isumaqarpugut, aatsaallu tassuunaquullugu isumaqaratta sulisinnaajunnaarnersiuteqalersiinnartarnagit inuttulli ikiorserneqarnikkut tunniussassaqaqarsinnaaneq nukissarlu nutaaq pissarsiarineqarsinnaasoq qularnanngimmat.

Taama oqarnitsinnut isumaqanngilaq inuit tamarmik sulisinnaajunnaarnersiuteqartut taamatut atugaqartuusut kisiannili peqqutivik paasiniartariaqarpoq pissutigalugu amerlaqisut sulisinnaasuussutsip ukiuini piukkunnarseruttorfiup nalaani ukioqartut sulisinnaajunnaarnersiuteqartut amerlammata.

# Nunatta Qitornai

## Inatsisartuni



Akornaniipput soorunami sulisinnaangivissortut sulisinnaajunnaarnersiuteqartussallu. Qanorluunniit, kiffartuussineq pitsaasoq aammalu kiffartuunneqarneq pitsaangippat maalaarsinnaatitaaneq pingaarluinnarpoq. Ullumikkumut atukkanut sanilliullugu pitsanngoriaataassaqaq.

Piginnaangorsaqqiinissamut suliniuteqarluni inatsisissaq siunertaqartoq ilassilluarparput. Ilassilluarparput inuk pineqartoq immikkut sullinneqartalissammat nalilersorneqartalissammallu. Alloriarneq pitsaasutut isigaarput ilassilluarparpullu.

Siusinaartumik sulisinnaajunnaarnersiuteqarneq aningaasatigut isertitassamiinnaangilaq, inatsisitigut erseqqissaassummiillunilu kiffartuunneqarnermi aammalu pisinnaatitaaffitsigut tunuliaqutserneqarnermiippoq aamma.

Siunnersuut ilassilluarlutigu ilaqutariinnermut peqqissutsimullu ataatsimiititaliamut ingerlateqqipparput.